

tarini, *olim* capi di creditori, andono da lui e tanto feno che non mandò la parte.

Fu posto, per, una parte di Cerigo, di uno.

Et veneno zoso a hore 3 di note, ni altro fu fato.

In questa matina se intese, per la nave venuta di Soria, come le galie di Baruto erano a l'isola di Mezo zà zorni . . . , et come a Corfù era morto sier Marco Antonio Badoer di sier Hironimo, patron di una di le dite galie.

Noto. Ozi, di ordine di Cai dil Consejo di X e di Avogadori di Comun, havendo avuto aviso che l'abadessa da cha' Surian di San Segundo havia mandato più casse piene di robe in casa di la moier di sier Antonio Surian dotor et cavalier suo nepote, in le qual erano arzenti et altre cosse sacre, di ordine dil Colegio mandono Zuan Agnolo capitano a la predita caxa, et cussi tolse da poi disnar dite casse per numero 8; et cargate in una piata, le portono a l'Avogaria, e il di sequente fu fato inventario; trovono poche cosse di chiezia.

76 La parte di sier Andrea Baxadona el consier, zercha l'Arsenal, e che il Patron et quelli saranno electi habino il criminal contra cadauno per le colpe sarano commesse in ditta casa, et habino di salario neti ducati 10 per uno, e metendosi alcuna angaria la Signoria pagi per loro, zoè siano refati di danaro di la Signoria, non derogando però la limitation dil Consejo di X, e a li presenti Patroni et quelli saranno electi li sia levà la contumacia poi harano compito el suo tempo. *Item*, cadaun di loro possino meter parte in questo Consejo per le cose di l'Arsenal lete però prima in Colejo; et che li eleti stagi in l'Arsenal, come vol le leze, et *solum* el cassier possi venir in Colejo, e questo soto la pena di furanti. *Item*, sia commesso a l'Armiraio et protti vadino vardando le opere di tutti lavora in Arsenal, et dagino in nota a li scrivani tutti i desordeni troveranno. *Item*, li Patroni inquirissi li nobeli che non sarano andati a li viazi, come vol le leze, e trovando, debano far li Patroni pagino a l'Arsenal le spexe di bocha, che non harano fate a essi nobeli. *Item*, li sia comesso a inquerir di esser stà cargà su le galie di viazi in lochi devedati, et a discargar di quelle sia presente uno Patron di l'Arsenal, qual debbi tuor in nota e inquerir di homeni non avesseno conduti su le galie, come è obligati, et quelli far debitori sora uno libro. E di dite pene, uno quarto sia di la Signoria, e li tre quarti de' ditti Patroni, *videlicet* di haver cargà in lochi devedati, e sorabondante, di manchamenti

di homeni, di nobeli mancati et statii et spese; e dita parte sia posta in Gran Consejo.

A l'incontro, 4 Savii ai ordeni, non era sier Zuan Francesco Mozenigo, messeno voler habino ducati 10 al mese senza altra graveza, e che li presenti e da esser electi, servito harano do anni, possino esser electi ad ogni rezimento di fuora; et compito i mexi 32 sono obligati star a l'Arsenal, non habino contumacia, e sia presa questa parte *etiam* in Gran Consejo.

A dì 29. La matina, vene in Colegio il Patriar- 77^o
cha nostro con il suo vicario, et fu con li Cai di X in materia di monache di le Contrade che bisogna *etiam* reformarle.

Da poi disnar, fo Consejo di X con la Zonta per expedir do Cechinati vicentini, sono in preson in Camera nova, de li qual è stà leto gran parte di processi. Questi do, con uno Cristoforo, qual fo squartato et era zenero di sier Hironimo Mocenigo, è stati in questa guerra marcheschi forte; ma hanno fato cose inormissime, sepelir homeni vivi, cavar i testicoli a uno prete per aver danari et comenzarlo a scortegar vivo, apichar a uno alboro uno vilan novizo e tuorli la noviza e usar con lei loro *multis modis*, amazar assa' persone e far cosse inormissime; ma il forzo de questi fece dicto Cristoforo, che fo squartato. *Etiam* questi è in dolo, si defendeno i hanno facto contra rebelli dil Stado nostro etc. Li Cai di X par volgino aiutarli; *quod erit scribam. Tamen*, non introno nel processo predito e ateseno ad altro.

Fu preso di scriver a l'Orator nostro in corte, impetri dil Papa vogli cometer di qui, che *etiam* il Patriarea vol refarmar li monasterii di Muran, Buran, Mazorbo et Torzelo.

Fu posto, per li Cai di X, di scriver al dito Orator in corte, impetri dal Papa beneficii primi vacanti nel Dominio nostro per ducati 200 a domino Ottavian da Pexaro vicario dil Patriarea nostro, atento la gran fatica ha 'uto in la reformazion di monasterii e aquistato grandissima inimicitia. Et sier Francesco Foscarei el consier li fo molto contrario. Parlò sier Luca Trun, Cao di X, per la parte, e il Doxe, qual volse intrar in la parte; *tamen* non fu presa. Ave: 10 di si, 20 di no. Manchava do di la Zonta, sier Marco Dandolo dotor, cavalier, è a Padoa, e sier Alvixe Dolfin è amalato. Et cussi non fu presa.

Item, nel Consejo di X *semplie*, preseno una parte, atento che i Provedadori electi per questo

(1) La carta 76 * è bianca.